

# Barweetaab Taayta nyēē kisirchi :Bāwulō Tēēsālōōnikēēk

*Taayta*

**Siriintēēt, kēnyiit nyēē / kikēēsirē āk wōlēē / kikēēsirēē:** Kisirē :Bāwulō barwaani kumiitē Kōōriintō ām kēnyiitaab 51 KK. Rubē :barwaani nyoo bo Kalatyeek ānku akeenke ām bārōōnōōkyii chēbo taay ām Kirootyeet nyēē Lēēl. Kitoow :Bāwulō kaniseet ām ruutoonyii nyēbo āyēēng' ām Tēēsālōōnikē nyi ki kiriinkēēt nyēē wōō miisin ām Maketoonnya. Nteenee king'eetee kiriinkoonoo areet akeenke kubo wōōrōōryēēt nyēē kiing'etng'eetaat :Yuutayeek (kasee Yēyuutēk 17:5-10). Yu kang'eetee Tēēsālōōnikē, kuwo ākoy Bereeya ankutas taay ākoy Aaten. Nto yityo, kōōyookto toorētiintēēnyii Tēmētēwō kuwo Tēēsālōōnikē wokōōtitiir kaniseet ankutas taay koonet, nteenee kiruutoochi :Bāwulō Kōōriintō (kur. 3:1-3). Kiwokuyit :nkinee Tēmētēwō lētuunoo Kōōriintō ānkuchokurāchi Bāwulō wōlēē kiwuu :ruutoonyii bo Tēēsālōōnikē kurubta keey āk kaniseet nyēē kiyyoong'oot ām wōlēē mii :Yēyiin ānkoo ki wōō :wusiisyēēt āk kwiilateet. Kumiitē :Bāwulō Kōōriintō, kusirchi kaniseet ām Tēēsālōōnikē barweet kōōkimkiimē ānkuwālchinē kāāyimuutēk chēē kiboonto kurubta keey āk kāāyēewunēētaab Yēēsu.

**Kiyēē miitē āriit:** Kimāchē :Bāwulō kōōtitiir kāāyēnēētaab Tēēsālōōnikēēk ām kāānēētuutēk chēē nāmē keey āk soboontaab Kiriistō āk

kāroomnyēēt nyēē boonto. Mwooyē :Bāwulō kule kukasee :biiko wōlēē wuu :soboonnyii ām wōlēē iyēnchintooy Kiriistō. Nto yityo, kuwālchi tēēbuutēkwaa. Imuuchē kikiikumēēyo :biiko kereeryaanto ām wusiisyēēt nyoo kitook, kunyoo kitēēbēē keey :choo kitākusobchootiin yoo imuuchē :nkicheek choo kiikubēk kutas choo māchokunyōōr :Yēesu yoo iyēēwu chokuyibē biikyii. Ikiimchinē :Bāwulō bichoo kule yoo kime :chii kukiikōōyēnchi Kiriistō, kutasē wōloo mii choo chokuyibē :Yēesu ānkumākuyēk mbo chēbo taay kōōwut soboontaab kibchuulyo (kur. 4:16).

**Kiyēē āmu:** Sooysooyē :barwaani ānkōōkomkoomu biikaab Kiriistō choo /kikiikēewu. Kimwoochi kule boonto keey :Yēyiin icheek ānkumākunyōōr biirtooyiisyēēt yoo iyēēwu :Kiriistō chokuyibē choo cheechii. Kunyoo, māchāktōōs :icheek kubāybāyiitu ānkuyēk nyikoon kumuyta nyālilulutēk ānkuminy kōōywēyē Kiriistō.

*Kyoorōōrchi keey :Bāwulō biikaab Tēesālōonikē ānkumākuyi bērrur*

<sup>1</sup> Anii ku Bāwulō ānkāaboontē keey Siila ākoo Tēmētēēwō. Āsirwook akweek kaniseet ām Tēesālōonikē choo obooyē Baaba Yēyiin āk Mokoryoontēēt Yēesu Kiriistō. Lēyyē, kōōbēruurook :Yēyiin ānkōōnyōōru kaalyeet.

*Kisoochi :Bāwulō kaniseetaab Tēesālōonikē ānkōōkiim*

<sup>2</sup> Kēēbirchinē Yēyiin kōōnkōy ākookoy kubo akweek tukul yoo kēēsoowook. <sup>3</sup> Kiisōōtook

ām yiisyēēt nyoo ōyēyē ōkoosēē keey inee ānkōōboontē chamateet. Kēēbirchinē Baaba Yēyiin kōōnkōy subak, kuuyu kyōōkiimchi keey ōkēnēē keey :Mokoryoontēēnyoo Yēesu Kiriistō. <sup>4</sup> Mbo ng'eetaabiya, kiinkētē kule kiikukweyaak :Yēyiin nyoo chāmook, <sup>5</sup> kuuyu yoo kikyoomwook lōkōōywēk chēē kāroomēch mēēbērē ki ng'al buch, nteenee kibo kāāmuukēy kuboonto keey Tāmirmiryēētaab Yēyiin soochamte :akweek manta. Ōnkētē :akweek mbo wōlēē kikiibuurtooy :acheek yoo kikēēboontē keey :tukul. <sup>6</sup> Kyoocham ōyēchi Yēyiin yiisyēēt kuu acheek. Kyootaach lōkōōywēchoo ām ng'erekweekaab Tāmirmiryēētaab Yēyiin ānkoō kiyeyaak / kēewusook. <sup>7</sup> Ām yooto nanyuun ōyēku kāānēētēywoo ām wōlēē mii :biiko tukul chēbo yēēmēētaab Maketoonnya ākoo Akaaya choo iyēnchinē Kāārārookiintēēt. <sup>8</sup> Mēēbērē kiyit :lōkōōywēkwook choo bo Mokoryoontēēt yēēmēētaab Maketoonnya ākoo Akaaya baateey, nteenee kikas :kōōrēēt tukul kule ōkoosēē keey Yēyiin. Kunyoo, māmii :kiy nyēē tākumāchāktōōs keemwaay. <sup>9</sup> Ng'āloolēē :bichooto tukul wōlēē kyoochamte ng'aleekyoo āk wōlēē kyootayte āynātōōs ankoorub Yēyiin nyoo bo manta. <sup>10</sup> Nto yooto ōkānyoonu lakwanyii kōōyēēwunēē kibkōōnkōy. Nyooto ku Yēesu nyoo kiing'ēētēē :Yēyiin meet. Inee :nyēē makuyeeteech / simākiing'woonchēēch.

---

**1:5** Yēyuut. 19:11; Room. 1:16; 1Kōōr. 2:4; 4:20; 1Tēes. 2:13    **1:6**  
 1Kōōr. 4:16; Yēyuut. 13:52    **1:8** Room. 1:8    **1:9** Yoowa. 17:3;  
 Yēyuut. 14:15

## 2

*Kyoorōōr :Bāwulō wōlēē kiwuu :soboonnyii ām Tēēsālōōnikē*

<sup>1</sup> Mbo ng'eetaabiya, ōnkētē :akweek kule mānāāwo buch :ruutooyto nyoo kikēekwoonii :acheek wōlooto. <sup>2</sup> Ōnkētē wōlēē /kisimkēewustēech / ānkiintosuurtēech ām \*kiriinkēetaab Filiibi. Ānkoo / kikeekwiileech miisin, kikōōnēech :Yēyiin nkuruuk kyoomwook lōkōōywēkyii chēē kāroomēch. <sup>3</sup> Okas kule kimākyoomtooy ng'al chēbo ng'wiiynan nto kikiisōōtē ng'al chēē mā kāroomēch nto kikēēbērē kule kēēkēnwook. <sup>4</sup> Kichamteech :Yēyiin ānkōōtōōrwēech :lōkōōywēchu kāroomēch. Kunyi, mēēbērē kyoomtooy lōkōōywēchu kule sikiing'ereech biiko, nteenee kyoomtooy kule sikiing'ereech Yēyiin nyoo inkētē kāāsōōtēywēkyoo. <sup>5</sup> Ōnkētē :akweek kuchurta kule mēēbērē kikeekwaante :acheek ng'aleek chēē kikiilēblēēbēēnook nto kikeekwaante ng'al chēē iyēēlē mooyēētyoontiit nyēē kēēboontē. Rōōbēēch mbo :Yēyiin kurubta keyy āk ng'aleechu. <sup>6</sup> Manaakeesyem kule nto okaasteech :akweek nto ku chii ake tukul, <sup>7</sup> ānkoo kiyemaat kēēnyikiisyook :acheek kēēyēku \*lēbkēēyikaab Kiriistō. Nteenee yu kikēēboontē keyy akweek kikēēyibook nyēē karaam kuu wōloo yibtooy :cheebyoosya nyēē ruroot :moo lōkōkyii kuriibē.

<sup>8</sup> Kikēēmāchē miisin kiibuurtē keyy āk akweek nyēē mēēbērē kikēēkōōnook lōkōōywēkaab Yēyiin baateey, nteenee kikiiboorwook ng'aleek

**2:2** Yēyuut. 16:19-24; 17:1-9    **2:3** 2Kōōr. 2:17    **2:4** Kala. 1:10

**2:5** Yēyuut. 18:3    **2:6** Yoowa. 5:41, 44    **2:7** 1Kōōr. 9:12

chēē rubtooy keey āk soboonwēkyoo, kuuyu kikeechamaak miisin. <sup>9</sup> Mbo ng'eetaabiya, maanii ōnkētē wōlēē kikeeyeyte yiisyēt āk wōlēē kikyoomtooy booryēt! Yooto kikēēyēyiisyē bēēt āk kwēemooy. Kikēēyēyē kuu nyooto simākēēnyikisyook yoo kikyoomwook lōkōōywēchoo bo Yēyiin.

<sup>10</sup> Yoo kikēēboontē keey akweek choo ōyēnchinē Kiriistō, kyookas ankiikukas :nkinee Yēyiin kule kēēyēku :acheek biich chēē kēēchurtootiin, chēbo man, amākēēboontē lēelis. <sup>11</sup> Ōnkētē mbo kule kikēēyibook :acheek kuu wōloo yibtooy :booyoo lōkōkyii. <sup>12</sup> Kikiititirook ānkiikiimchook kule ōyēyē ng'aleek chēē ing'ērēēchē Yēyiin nyoo kuurook bōōbuur :tukul oyemte bāytooyiisyēēnyii ākoo wōōyinnyii.

<sup>13</sup> Kēēbirchinē Yēyiin kōōnkōy ākookoy, kuuyu yoo kikēēyibwook lōkōōywēkyii okas ankoocham amēēbērē kuu lōkōōy chēbo chii buch, nteenee bo Yēyiin. Man, yēyiisyē :ng'ālyoontoonoto am āriing'woong' akweek choo ōyēnchinē Kiriistō. <sup>14</sup> Kyōōnyōōru :akweek, mbo ng'eetaabiya ng'aleek chēē kerkeey ākoo choo kinyōōru :biikaab Kiriistō choo mii Yuuteeya. Kiinyaliilaak :biikwook kuu yoo kiinyāliilē icheek :Yuutayek <sup>15</sup> choo kibākāchē Mokoryoontēēt Yēesu ākoo \*wōōrkooyikaab Yēyiin ankukweteach acheek. -Mēēng'ērēēchē :bichoo Yēyiin ānkukwiilē

---

**2:8** 2Kōōr. 12:15    **2:9** Yēyuut. 18:3    **2:10** 2Kōōr. 1:12    **2:11** Yēyuut. 20:31; 1Kōōr. 4:14-15; Kala. 4:19; 1Tēm. 1:2; 2Tēm. 1:2; Tiitō 1:4    **2:12** Room. 5:2; Filib. 1:27    **2:13** Kala. 1:11-12; 1Tēes. 1:5  
**2:14** Yēyuut. 17:5

chii ake tukul. <sup>16</sup> Kisyeem mbo kule nto kerekteech kyoomchi lōkōōywēk biiko choo mā Yuutayeek, lōkōōy chēē kimakuyey /kiiraraach bichoo. Nteenee mii kutāsyinē :Yuutayeekchaa ng'ōōkiswookik alak ām chooto boonto. Kunyoo, kōōkōōng'woonchi icheek :Yēyiin.

*Kyoomchi Bāwulō :yēēmootēt kuruutoochi Tēesälōonikēek*

<sup>17</sup> Mbo ng'eetaabiya, ānkoo kookuyeyeech :biiko keebakaakte keyy kisich ām bōōrwēk, kiisōōtook ākookoy ām tāmirmiryēt. Kaakwaameech :yēēmootēt miisin keekasaak subak. <sup>18</sup> Kiyooto :nyēē kiyeyeech keemach kiyyēwu wōloo ōmiitē. Kyaasyeem :anii Bāwulō kunyil areet chēē chaang' kule nto āyēēwu wōloo ōmiitē nteenee kikerekteech :Kibrōkōsyoontēt. <sup>19</sup> Mbo ng'oo :chēē kiikēnēē keyy :acheek ānku ng'oo :chēē kēēng'ērēchēē, nto ku ng'oo :chēē kēēng'āsēē keyy yoo +/ mākēētuwēnēēch ām taayeetaab Mokoryoontēenyoo Yēesu bēsyoonoo iyēēwu? Mā akweek? <sup>20</sup> Kubooyiit man, akweek :chēē kēēng'āsēē keyy ānkēēng'ērēēchēē.

### 3

*/Kikiyookto Tēmētēwō ānkuchōōnto lōkōōy chēē kārōomēch*

<sup>1</sup> Yu kakeekas kule kimēēkiimuuchē takeemuyte, kiisoot kēēng'ētunēē \*kiriinkēetaab Aaten  
<sup>2</sup> ānkiiyooku ng'eetaabiya Tēmētēwō nyoo

**2:15** Mat. 5:12; Yēyuut. 2:23; 14:19; Room. 11:28; 2Kōōr. 11:23-29

**2:16** Mat. 23:31-32    **2:17** 1Tēes. 3:10    **2:20** Filib. 2:16; 4:1

**3:1** Yēyuut. 17:14

kēēyēchinē :tukul Yēyiin yiisyēēt kyoomtooy lōkōōywēkaab Kiriistō. Kikiiyooku chokōōtitiirook ānkōōkiimook okaasee keey Kiriistō <sup>3</sup> sukung'eet mēebērē +/ mākiinyēbēēt chii ām akweek kubo wusiisyooni. Ōnkētē :akweek kule māchāktōōs kēēbuntēē wusiisyēēt. <sup>4</sup> Kisimkēēmwoowook oob kēēboontē keey kule +/ mākēēwusēēch? Kunyi, kōōkuyēyākiis kuu nyooto, kuu yoo ōnkētē. <sup>5</sup> Kiyooto :nyēē kiyeya āyooku Tēmētēēwō. Kimāāmuuchē taamuyte subak. Kunyoo, āyooku inee chokukas yoo tōōkoosēē keey Kiriistō. Kyāāmuy akas ām kēēlto ake kule kityemaak \*:Kēniintēēt sukubooyiit buch :yiisyoonoo kikēēyēyē.

<sup>6</sup> Kōōkōōyēēwunēē :Tēmētēēwō wōloo ōmiitē, ānkōōkuyibwēēch lōkōōywēk chēē kāroomēch kurubta keey kaakaaseeng'woong' āk choomnyēēt nyēē ōboontē. Kōōkumwoowēēch kule ōsōōtyēēch ākookoy nyēē karaam ānkōōmāchē kule nto okaseech kuu yoo kēēmāchē :nkacheek kule nto keekasaak. <sup>7</sup> Lēyyē, mbo ng'eetaabiya, kōkēētītir yu / kākyoomwēēch wōlēē wuu :kaakaaseeng'woong' ām Kiriistō ānkoo / kiinyāliilēēch / ānkēēwusēēch. <sup>8</sup> Yoo kōōkiilchi :akweek Mokoryoontēēt kēēng'ērēchē :acheek <sup>9</sup> nyēē māmiitē :wōlēē +mākēēbirtoochi Yēyiintēenyoo kōōnkōy. Kēēng'ērēkootiin miisin ām taayeenyii kubo akweek. <sup>10</sup> Kēēsooyē inee ākookoy bēēt āk kwēēmooy kule nto keekasaak sikiititiirook ānkēēkōōnook kiyēē -mōōboontē kurubta keey

ng'ālyoontēētaab Yēyiin.

<sup>11</sup> Kēēsooyē Baaba Yēyiin āk Mokoryoontēenyoo Yēesu kule kuyootwēech kēlto keekwaa bokeekasaak subak. <sup>12</sup> Lēyyē, kuyey :Mokoryoontēēt kuwōōyiit :choomnyēēt nyoo ōboontē āk chamateet nyoo ōboontēē chii ake tukul, kuu nyoo kēēboontēēnook :acheek. <sup>13</sup> Kōōtitiir :Yēyiin kāāsōōtēywēekwook soochurte ānkōōtililiitu ām taayeetaab Baaba Yēyiin kuboonto keey biikyii tukul, bēsyoonoo chōōnii :Mokoryoontēenyoo Yēesu.

## 4

### *Soboonto nyēē ing'erēēchē Yēyiin*

<sup>1</sup> Kunyoo ii, mbo ng'eetaabiya, ābērē kiikiineetaak wōlēē /kiibuurtooy /sikiing'ereech Yēyiin ānkuwuu nyooto :wōlēē ōbuurtooy. Nanyuun, kiikāloonē kēēmwoowook ām kaayneetaab Mokoryoontēenyoo Yēesu kule, otas taay miisin oyey kuu nyooto. <sup>2</sup> Ōnkētē ng'aleek choo kikiiboorwook :acheek kubununēē kāāmuukēywēēkaab Mokoryoontēēt Yēesu. <sup>3</sup> Mākyook :Yēyiin ōtililiitu -āmōōmārtootē. <sup>4</sup> Kuyibē :murēno ake tukul koorkeēnyii ām kēlto nyēē tiliil ānkubo koonyit. <sup>5</sup> -Mookany kutwaaraak :muchastaab bōōrwoonikwook kuu bichoo -mēēnkētē Yēyiin. <sup>6</sup> Ām ng'ālyoo nyēē wuu nyiitēnyi, mā-ālāk :chii ng'eetaabkaamet. Kisimkiisōōwook kule mākōōng'woonchi :Yēyiin biiko choo yēyē rōkōōsiitēnyi. <sup>7</sup> Kimākuurēēch :Yēyiin kule subokēēmārtootē, nteenee mächē kule



kiibuur kāāburto nyēē tiliil. <sup>8</sup> Kunyoo, yoo ōtāyē kāānēētēywēēchu mēēbērē kootay chii, nteenee kootay Yēyiin nyoo kōōnook Tāmirmiryēēnyii.

<sup>9</sup> Nto nanyuun ng'alyoo kurubta keey āk chamateetaab mbo ng'eetaabiya, māmāchāktōōs kēēsirwook kiy, kuuyu kiikooneetaak :Yēyiin ōchoomtōōsii.

<sup>10</sup> Kyōōbuur :nakweek kuu nyooto ōchāmē mbo ng'eetaabiya tukul choo mii yēēmēetaab Maketoonnya. Kunyoo ii, mbo ng'eetaabiya, kēēsoomook kule ōchoomtōōsii miisin. <sup>11</sup> Okas kule ōbuurē ām kaalyeet ānkōōyēyē yiisyēēng'woong' nkit ō-āmē kiyēē kōōbirtēē nkuruukwook kuu yoo kisimkēēmwoowook.

<sup>12</sup> Yoo kōōbuur kuu nyiitēnyi, mākuoonyitook mbo :biiko choo mēēbērē iyēnchinē Mokoryoontēenyoo āmāmii :kiy nyēē mākubotwook.

### *Chōōnēētaab Mokoryoontēēt*

<sup>13</sup> Mbo ng'eetaabiya, kēēmāchē ōnkēt manta kurubta keey āk biiko choo kiikubēk simōōmēēsyē kuu biiko choo māboonto kiyēē ikēnēē keey.

<sup>14</sup> Kēēchāmtooy kule kime :Yēēsu ankung'eetee meet. Kunyoo, kēēchāmchiintōōsii kule makoong'eetee :Yēyiin meet biiko choo kiikubēk kuu yoo kiing'ēētēē Yēēsu.

<sup>15</sup> Kāānēētēywēēkaab Mokoryoontēēt :chu chēē kēēmwoowook: -Mākiintōōyē :acheek choo kēēsobchootiin ām choo kiikubēk bēsyoonoo chōōnii :Mokoryoontēēt. <sup>16</sup> Mākuwookyī \*:malayikeet nyēē

---

**4:7** Filib. 1:27; 1Bēt. 1:15-16    **4:8** 1Kōōr. 6:19-20    **4:9** Cherem. 31:33-34; Yoowa. 6:45; 1Yoowa. 2:20, 27    **4:11** Ēfēes. 4:28; 1Tēes. 2:9; 2Tēes. 3:10, 12    **4:12** Kolos. 4:5    **4:13** 1Kōōr. 15:19; Ēfēes. 2:12    **4:14** Room. 14:8-9; 1Kōōr. 15:3-4, 12, 20

wōo barak / ankeekuut aryeembuutaab Yēyiin. Yooto nanyuun mākuchōōnēē :Mokoryoontēēt Kaab Yēyiin. / Makiing'etee meet kurook :biikaab Kiriistō choo kiikubēk. <sup>17</sup> Nto yityo, / kiiruruuchēēch acheek choo tākēēsobchootiin kēētuyē āk bichooto keebeete keey wōliin bo boolik bokēēyēmē barak āk Mokoryoontēēt. Kuchakee yooto nanyuun, +mākiibuurtē keey Mokoryoontēēt ākookoy. <sup>18</sup> Kunyoo ii, lēyyē, ōtitiirēē keey ng'alechu.

## 5

### *Ōchōb keey kubo chōōnēētaab Mokoryoontēēt*

<sup>1-2</sup> Mbo ng'eetaabiya, māmāchāktōōs kēēsirwook kurubta keey bēsyēēt nyēē chōōnēē :Mokoryoontēēt, kuuyu ōnkētē :nkakweek kule mākumuung' kuu chōōriin nyoo chōōnii kwēēmooy. <sup>3</sup> Bēsyēēt nyoo mwooyē :biiko kule kaalya :kōōro / ānkēēriibootiin, ku yooto :yēē +/- makiiserweetee bichoo. Māchililē :chii. Mākumuunkyī bichoo :ng'alechaa kuu ng'woonin nyoo nyōōru :koorko nyoo māchē kōōtuusyo. <sup>4</sup> Nteenee -mōōmiitē :akweek mbo ng'eetaabiya mēēnān nyēē imuuchē kunyōōrwook :bēsyoonoo -kumōōchōbootiin. <sup>5</sup> Ōbooyē :akweek tukul lēbkēēyyēēt ānkōōbooyē bēētut. -Mākēēbooyē kwēēmowuut -āmākēēbooyē mēēnānēēt. <sup>6</sup> Kunyoo, māmāchāksē kēēruuyē kuu biiko alak, nteenee māchāksē kēēyēku biich chēē kāsunoottiin ānkēēriibē keey. <sup>7</sup> Bo :rwoonik

---

**4:16** Māarkō 13:26; 1Kōōr. 15:51-52    **4:17** Yoowa. 12:26; Room. 5:17; Filib. 1:23    **5:1-2** Māarkō 13:32; Mat. 24:27, 43    **5:3** Cherem. 6:14-15; Mat. 24:39

kwēemooy ānku kwēemooy yēē bōōkiitōōs :biiko.  
 8 Nteenee kēēbooyē :acheek bēētūut, kunyi  
 māchāksē kēēriibē keey. Māchāktōōs kiiluume  
 keey kaakaaseet āk chamateet kuyēk kariikaab  
 booryēēt choo / kiilookyinē teket, ankiilaach  
 nkinee kāākēnēēt nyēbo kaararaacheet kuu  
 kuutwēetaab booryēēt nyoo / kiilookyinē mēt.  
 9 Manaakweyeech :Yēyiin sukōōng'woonchēēch,  
 nteenee māchē sukooraraacheech kubununēē  
 :Mokoryoontēēt Yēesu Kiriistō. 10 Kime :Kiriistō  
 kubo acheek kule subokēēminy āk inee ānku yoo  
 tākēēsobtōōsii ee, nto kukiikēēbēku. 11 Kunyoo,  
 māchāktōōs ōtitiirē keey ānkōōsooysooyē keey kuu  
 yoo ōmiitē ōyēyē kuunyiiitēnyi.

### *Kāā-āmiisēēt*

12 Mbo ng'eetaabiya, kēēsoomook ōkoonyit bichoo  
 kiikukwey :Yēyiin choo āmē booryēēt kōōntōōwook  
 ānkōōtitiitirook ām Mokoryoontēēt. 13 Ōkoonyitē bi-  
 choo miisin ānkōōchāmē ām yiisyēēt nyēē yēyē.  
 Nto akweek, ōbuurtē kaalyeet.

14 Kiikāloonwook akweek mbo ng'eetaabiya  
 kule ōchuulē biiko choo tinyē kēwēynātēēt, ōtitiir  
 choo nyōkōōrēch, ōyēētyēēchinē choo kuskusēch  
 ānkōōmuytoochinē chii ake tukul. 15 Okas kule  
 māmii :chii nyēē kākētyi ake miyootyēēt, nteenee  
 ōsyēēmē ākookoy ōboorchinē karaamateet biiko  
 tukul.

---

5:8 Room. 13:11-12; Ēfēēs. 5:8-9    5:8 2Kōōr. 10:4    5:9 1Tēēs.  
 1:10    5:10 Room. 14:8-9; 1Tēēs. 4:14    5:12 1Kōōr. 16:15-18;  
 1Tēm. 5:17    5:13 Māarkō 9:50    5:14 2Tēēs. 3:6, 11-12, 15    5:15  
 Room. 12:17

16 Ōng'ērēchē ākookoy, 17 osooyē āsiiswēk tukul, 18 obirchinē Yēyiin kōōnkōy ām yēēt ake tukul. Ng'alyoo :nyi nyēē mākyook :Yēyiin oyēyē ām Kāārārōokiintēēt Yēesu.

19 -Mōōmiis Tāmirmiryēētaab Yēyiin. 20 -Mōōchuur ng'aleekaab \*wōōrkooyik. 21 Ōrōotootē tukuuk tukul ānkōōnāmē choo kāroomēch 22 ankootayee keey kiy ake tukul nyēbo rōkōs.

23 Kuyeyaak :Yēyiin nyoo kōōnu kaalyeet ōtililiitu ām keel ake tukul. Kuriibākoy :tāmirmiryēētaab chii ake tukul, soboonnyii āk bōōrnyii nyēē māmii :lēēlis ākoy yoo iyēēwu :Mokoryoontēēnyoo Yēesu Kiriistō.

24 Māwēēchwēēchē keey :nyoo kikwēyook ānku makuyey kuu nyotoo. 25 Mbo ng'eetaabiya, ōsoowēēch acheek. 26 Ōsuboowoo mbo ng'eetaabiya alak tukul nyēē ōng'ērēkyinē. 27 Amwoowook ām kāāmuukēywēēkaab Mokoryoontēēt kule ōsumānchi barwaani mbo ng'eetaabiya tukul. 28 Kōōbēruurook :Mokoryoontēēt Yēesu Kiriistō.

---

5:16 Filib. 2:18 5:17 Luuka 18:1 5:20 1Kōōr. 14:39 5:21  
1Kōōr. 14:29; Ēfēes. 5:10; 1Yoowa. 4:1 5:23 2Kōōr. 13:11; Filib.  
1:10 5:24 1Kōōr. 1:8-9; Filib. 1:6; 2Tēes. 1:11; 3:3 5:25 Room.  
15:30 5:26 Room. 16:16 5:27 Kolos. 4:16

**Biibilya Nyēē Tiliil**  
**New Testament in Sabaot (KE:spy:Sabaot)**

copyright © 2011 Wycliffe Bible Translators, Inc.

Language: Sabaot

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9966002030

**The New Testament**

in Sabaot

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files  
dated 29 Jan 2022

c68c9dca-518f-544b-a52e-82240cf64928